

## REGIONAL NEWS

HEADLINES:-

1. Congress MLA, Palak Constituency bialtu, Pu KT Rokhaw chu MLA a nihna atangin a bang.
2. Mara Autonomous District Council Siaha East-1 MDC bial By-election ah MNF Candidate Pu Nelson Khenglawt thlan tlin a ni.
3. Prime Minister Narendra Modia chuan vawiin khan Chhatisgarh-ah hmasawna hnathawh hrang hrang cheng vaibelchhe sing 2 sang 6 hu bultanna lungphum a phum
4. World Bank chuan sawrkar kum 2023-24 chungin India eibar dinhmun chu zaa 6.3 in a thang dawn a ti

&lt;&gt;&lt;&gt;&lt;&gt;

KT ROKHAW RESIGN

Congress MLA, Palak Constituency bialtu, Pu KT Rokhaw chuan vawiin khan MLA a nihna atanga banna Speaker Pu Lalrinliana Sailo hnenah a thehlut a, Pu KT Rokhaw hi MLA inthlanpui lo awm turah MNF ticket in a ding dawn a ni.

Pu KT Rokhaw banna hi Assembly Speaker Pu Lalrinliana Sailo chuan a pawm sak a, banna a thehluk zawha thuthar thehdarhtute zawhna chhangin Pu KT Rokhaw chuan a bial mipuite nen inrawn chung a thutlukna siam ani tih a sawi a, a bial chu Ruling MLA biala a awm ve a duh avanga Congress MLA a nihna atanga bang leh MNF ticket a din tum a nih thu a sawi.

Pu KT Rokhaw chuan MNF Sawrkar chuan term 2 nan sawrkarna an siam leh ngei ang tih chu Mizo mipuite rin dan vek ani a ti a, a bial chu Ruling bial ni ve ngei turin a duh tih a sawi baw.

MNF Candidate tura thutlukna a siam hma in a bial chung tlawh chhuak vekin mipuite ngaihdan a la vek tih a sawi a, Congress Party hruaitute leh MNF Party hruaitute ngaihdan a la tel tih sawiin MNF Candidate ani tur chu an thlawp vangin thutlukna a siam a ti a, Congress MLA atanga banna Speaker hnena a thehluk bakah hian Congress Party a Primary member a nihna chu Congress ah a thehlut tih a sawi baw.

&lt;&gt;&lt;&gt;&lt;&gt;

SPEAKER

MNF Party chuan inthlanpui neih tura an candidate tur te an tichiang tawh a, naktukah an puang ang.

MNF party ticket chang lo tura rin zingah Assembly Speaker leh Chalfilh bialtu MLA Pu Lalrinliana Sailo a tel a, Akashvani Corr in a kawmnaah Pu Lalrinliana Sailo chuan candidate tura hnawl a nih chhan a hre lo tih a sawi a, MNF in ticket pe leh se Chalfilh bial ah a tlin leh ngei a ring a ti a ni.

Pu Lalrinliana Sailo chuan tun dinhmunah MNF ah awm zel ala tum a ti a, Politics ah erawh thil thleng theilo a awmlo tih sawiin thian hlun leh hmelma hlun an awmlo a ti baw.

Tun inthlanpuiah MNF an tlin a rin leh rinloh chungchang zawhna chhangin Speaker chuan ropui lai taka ingaih laiin tlak a awm a, tlinga ingaih lai takin tlakpui kum te pawh a thleng thei tih a sawi baw a. Pu Lalrinliana Sailo chuan tun dinhmunah party dang atanga din tumna emaw independent a din tumna chungchang chu ala ngaihtuah loh thu a sawi a, Party dang atanga sawmna te chu dawng ve thin mahse helam lam hawi zawngin ngaihtuahna ala hmang ngai lo a ti a, Mizoram ah chuan party behchhan neilo chuan tlin a harsat vangin independent a din chu a tumlo tih a sawi baw.

Pu Lalrinliana Sailo chuan Speaker hna chu lai taka awm tur anih avangin party thilah pawh a tel tamlo tih a sawi a, Hnam Runah pawh a kal khat tih sawiin tun term chung a Speaker laiin thutlukna harsa tak tak siam ngai a awm a ti a, thian ang a en thin Pu Laldhoma te pawh hrehawm ti tak chungin ban a ngai a ti a ni.

&lt;&gt;&lt;&gt;&lt;&gt;

## DY CM

Deputy Chief Minister, Tuichang bialtu ni bawk chuan vawiin khan Tualte Tomato Processing Unit a hawng.

Vanhnuailiana Hall, Tualtea hawna inkhawmah thusawiin Pu Tawnluia chuan Tualte khuain eizawna atan Tomato an hmang thei chu a lawmpui thu a sawi a, bazara zawrhchhuah mai piahlamah tomato sawngbawl theih a ni tur leh vawnthat a ni tawh tur chu thil lawmawm tak a ni, a ti. Tualte khuain ruahtui tlak mumal loh kumah pawh cheng nuai 200 man chuang tomato an thar chhuak tawh chu thil lawmawm tak a ni, a ti bawk. Kuthnathawktute chu an hlawhtlin chhoh zel a beisei thu sawiin, theihtawp chhuah a hma lo la zel turin a chah.

Deputy Chief Minister hian tunhnaia sawrkar sikula hlan kai tak Tualte High School chu a lawmpui thu a sawi a. Sialhawkah Pineapple Processing Plant din tura hmalak mek a nih thu te, Chawngtlai leh Khawhaiah sapthei ching tura ruahmanna kalpui mek a nih thu leh cheng nuai 30 man chuang sapthei zamna thirzai sem chhuah a ni tawh tih a tarlang. A department chan PHE hnuiaia hmalakna pawh tarlangin Pu Tawnluia chuan Tuichang AC huamchhungah commission hmabak Khawhai chhiar telin khawtinah tui pek vek a ni tawh a ti a. Mizoram sawrkarin SEDP hmangin mitin huapzo hmasawna tluantling a kal pui mek zel thu pawh a sawi bawk a ni.

Khawzawl District Horticulture Officer Pu Lalnunpuia'n Technical Report-a a tarlan danin, Tomato Processing Unit hi SEDP sum cheng nuai 50 hmangin April ni 21, 2023 khan a hmun laih hna thawh tan a ni a. Tomato sawngbawlina khawl 'Tomato Ketchup Line' hi cheng nuai 40 man niin, FOCUS (IFAD) hnuai atanga lei a ni a, a bunna tur building hi square meter 108 a zau a ni.

Inkhawma tarlan danin Tualte khua hian kum 2019 atang khan Tomato an ching tan a, tun dinhmunah tomato variety chi hnih - Arka Samrat leh Arka Abhed te chingin chhungkaw 200 chuangin eizawna'n tomato hi an hmang mek a ni. Kum 2023 September thla thleng hian cheng nuai 200 man tomato an hralh chhuak tawh a; kum 2019-2023 chung hian Tomato atangin cheng nuai 1193 chuang Tualte khua hian an lalut tawh a ni.

<><><>

## MADC BYE-ELECTION

Mara Autonomous District Council Siaha East-1 MDC bial By-election ah MNF Candidate Pu Nelson Khenglawt thlan tlin a ni.

MADC-a Siaha East-1 bialtu MDC a thih avanga State Election Commission in thla kalta, September ni 29-a By-Election a buatsaiha vote tla te chu vawiin chawhma khan Siaha DRDO Conference Hall-ah chhiar a ni a, vote tla zawng zawng 2093 atangin, MNF candidate Pu Nelson Khenglawt chuan vote 1000 hmuin, tlinga puan a ni.

Inthlan hi kil li atangin an inchuh a, MNF candidate hnaih bertu ZPM candidate Pu Tlanzara Hranglung chuan vote 653 hmuin, INC candidate Pu F. Lallawmawma'n vote 324 a hmu a, BJP candidate Pu R. Laltanpuia'n vote 112 a hmu a, NOTA ah vote 4 a tla bawk a ni.

MDC bial 25 awmna MADC ah hian inthlan hnuhnung berah party mala sorkarna siam thei an awm lo va, MDC 12 nei, BJP leh MNF MDC 9 ten sorkar intawm an siam mek a, INC chuan MDC 4 neiin, tuna by-election neihna INC MDC chu a thih avangin INC hian MDC 3 an nei mek a, MNF chuan MDC 10 an nei tling ta thung a ni.

<><><>

## CADC ZPM

Chakma District ZPM ten CADC CEM Pu Rasik Mohan Chakma leh a thawhpui MDC te MNF a an let leh chhanah MLA Candidate leh inthlemna avanga let leh an nih an rin thu an sawi.

Chakma District Zoram People Movement te chuan vawiin khan thuthar thehdarhtute kawmin, CADC CEM nilai Pu Rasik Mohan Chakma leh a thawhpui, MDC ten MNF atanga an ban hnuah ZPM zawm tura an insawi laiin, MNF a an let lehna chhan chu inthlemna avang a ni thei an ti a ni.

Tun thla ni 1 khan CADC CEM Pu Rasik Mohan Chakma leh a thawhpui MDC te chuan MNF atanga banna thehlutin, ZPM an zawm dawn tih an sawi hnuah, nimin khan MNF ah an let leh a, hemi chungchangah Chakma District ZPM chuan, Pu Rasik Mohan Chakma hi MNF Headquarter lam atangin MLA Candidate pek an tiam avanga let leh a nih thu an sawi a, thlemna thildang pawh a awm ngei an rin thu an sawi. Chakma District ZPM hruaitute chuan Pu Rasik Mohan Chakma te hi ZPM zawm tur hian an sawm lova, MNF atanga an ban khan ZPM an zawm duh thu tawngka in an dawng mai tih an sawi a, chu chu lawm taka lo dawnsawn an tum laiin MNF lamah an kir leh ta an ti a ni.

<><><>

### RD MINISTER

Rural Development Minister Pu Lalruatkiman vawiin khan Kawrtethawveng BDO Pisa leh BDO Quarter Building a hawng a. He hunah hian ICT Minister Pu Robert Romawia Royte chuan NABARD kaltlanga sak tur Village Knowledge Center lungphum a phum nghal bawk.

Pu Lalruatkima chuan RD Block thar a lo pian nan March ni 25, 2022-ah RD Department chuan hma a la tan a. Kawrtethawveng RD Block ah hian khawtlang hmasawna piah lamah Zoram dinhmun ngaihtuahin Kawrtethawveng-ah hian pal rinawm tak dah a nih loh chuan he hnam lokal zel tur hian enge a tawn ang tih ngaihtuahna thui tak a awm a ni a ti a. He hnam nihna thinlung, ram lokal zel tur hnam pasaltha te'n an thlah lokal zel tana ram an lo zuah hi hnamdangin an luah ang tih hlauhthawna tlang atangin RD Block pahnih Kawrtethawveng leh Tlabung hi a lo piang chhuak ta a nih thu a sawi.

Pu Lalruatkima chuan Mizoram Population a pung chak lo a, chu chuan nakinah harsatna hnam ang pawhin a thlen thei a ni a ti a. Ram himna ngaihtuah rengin hnam tan fahrin man hla ni tura tan lak zel a ngai a ni a ti.

Pu Robert Romawia Royte chuan hunrei tak ata tawh mi hmasate pawhin an lo vei leh nghahhlelh em em Kawrtethawveng BDO hawn a nih mai bakah Office tha tak hawn a ni ta chu thilchhinchhiahtlak leh lawmawm tak a ni a ti a. I&CT Department hnuaiah Mizoram chhunga Center 15 zinga Center pakhat niturin Village Knowledge Center, Kawrtethawveng RD Block Office behchhana dah tel an ni ta chu khaw mipuite'n tangkai taka an hman a duhsak thu a sawi a, tihchangtlun chhunzawm zel a nih dawn thu a sawi bawk. Kawrtethawveng Tennis Court chu Sport Department kaltlangin thumthata chei thar tum a ni a, Khawtlang remtihna-a Sport Items danga hman theih tura her rem dan pawh ngaihtuah a nih dawn thu a sawi bawk.

<><><>

### BLOOD DONATION

National Voluntary Blood Donation Day vawiin khan Siaha ah AVBD, DC leh Health & Medical Dept te tanghoin Dist. Hospital conference Hall ah hun an hmang a. ECM HSS atangin mi 7 leh DBS atangin mi 3 in thisen unit 10 an pe a ni.

Dist. Hospital Med.Supt.Dr. C. Lalrosanga kaihrui ah hian "Blood donation pawimawhna" te sawiho a ni a.

Vawiin National Voluntary Blood Donation Day ah Higher Secondary pathum ECM HSS, Foxall HSS leh Donbosco HSS te sawm an ni a, blood donation kalpui zui a ni.

<><><>

### PM

Prime Minister Narendra Modia chuan vawiin khan Chhatisgarh-ah hmasawna hnathawh hrang hrang cheng vaibelchhe sing 2 sang 6 hu bultanna lungphum a phum. PM Modia hian NMDC greenfield Steel Plant a chu Nagarnar ah a hawng bawk a ni.

PM hian vawiin vek khan Kunkuri leh Chhatisgarh-Jharkand inrina kawngpui siam thar a hawng bawk a ni.

<><><>

## WORLD BANK

World Bank chuan sawrkar kum 2023-24 chhungin India eibar dinhmun chu zaa 6.3 in a thang dawn a ti. Harsatna hrang hrang karah ram eibar zawnnain nasa taka hma a sawn tih World Bank chuan a tarlang a.

April thlaa an lo chhut lawk danin zaa 6.6 atangin zaa 6.3-ah a ti tlem a. World Bank-in India Development Update (IDU) a tarlan danin India eibar dinhmun chu khawvelin harsatna tam tak a tawh karah kum 2022-23 khan ram lian zinga thang chak ber niin zaa 7.2 a kai a ni tih a tarlang.

<><><>

## CHINA ASIAN GAMES

China-a Asian Games neih mekah India chuan medal 62 a la tawh. India infiammite hian gold 13, Silver 24 leh bronze 25 an la tawh a. A pumpuiah palina dinhmun an hauh mek a. China chuan medal 275 lain pakhatna a hauh mek a ni. Japan leh South Korea ten an dawt a ni.